

seyn bey straff der vorweysung, und das die preceptores yhre discipulos sollichs unsers gebots treulich und vleissigk sollen erinnern. Deßgleichen sollen alle handtwergksleute, ob sie gleich aigene heüser aldo haben und bürger seyn, dorzcu alle handtwergks und andere ledige gesellen in derselben unserer stadt Leiptzk keyne wehre tragen, es sey
 5 messer, bleykügel, büchssen und anders bey straf des gefengknüis und der vorweysung, und soll der radt sollichs den handtwergern und andern alle quartal bevahlen, auch in denen heusern, dorinnen die handtwergksgesellen yhre herberg haben, solchs schriftlich anschlahen lassen und die ubertreter von beyden teylen unnachleßlich gestrafft werden. Würde aber eynich teyl sich mit der straff nachlessigk ertzeigen, sol uns oder unsers
 10 abwesens unserm ambtman solchs von den andern angetzeigt werden, dan wöllen wir die straff also vorordenen, das andere dovon abscheu zcu haben ursach nemenn mügen. Dan weyl unsere stadt Leiptzk friden, recht und schutz hat, so wollen wir die ungehorsamen und vorechter dises unseres gebots ungestrafft nicht bleiben lassen. Darnach sich eyn yder tzu richten. Und sol von beyden teylen verbotten und nicht gestattet werden
 15 bey nechtlicher tzeit nach neun horen auf der gassen ane gescheffte und wintertzeit ane licht zcu gehen. Doran geschicht unser gantzliche meynung. Czu urkund mit unserm secret besigelt und geben sontags cantate den dritten maii, nach Christi unsers lieben herren geburt im funffzcehnhundert und fünff und viertzigsten iar.

M. h. z. Sachssen m. pp. ss.

20

459.

Gregor Schlüsselfelder Bürger zu Leipzig verspricht, daß er, nachdem er das Haus des Georg Lürtsch an der Thomaskirche gekauft habe, die auf demselben ruhende Schuld von 105 Gulden zu Michaelis d. J. 1546 an die Collegiaten des großen Collegs bezahlen wolle. Leipzig, 1545 Oct. 9.

Hdschr.: Copiale des großen Fürstenkollegs fol. 43.

25 Nachdem uff Georgen Lürtsch seligen hause kegen sant Thomaß kirchen ubir gelegen hundert und fünff gülden behörendt zcu eynr lection in theologia von alther hafften und nach iüngst gethanem kauff von gedachts Lurtschen erben ich Gregor Schlüsselfelder bürger alhier in sülche schuldt zcu treten und also den herrn collegiaten des grossen collegii zcu entrichten auff mich genummen, so gerede und zeusage ich bey
 30 treuen und waren Worten, das ich sülche hundert und fünff gülden uff Michaelis schirst künfftigk im sechs und viertzigsten iare yhnen den herrn obgedacht ane weyterung und alle yhren schaden entrichten und betzalen und also gedachte meyne güther yhres vorhaffts entledigen will, die den glaubigern unterdes zeum willigen pfandt alletzeit eynstehen sollenn. Des zcu urkunt ich meyn secret hiran gedruckt und gegeben zcu
 35 Leiptzk 1545 am tage Dionysii.